

प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन
(छत्तीसगढ़ी)

18.10 रविवार

दिनांक 29.09.2024

प्रमुख समाचार –

- 1— आकाशवाणी ले आज 'मन की बात' कारीकरम के एक सौ चौदहवां कड़ी म प्रधानमंत्री ह मेक इन इंडिया पहल के सफलता के उल्लेख करीन—मुख्यमंत्री ह जन-प्रतिनिधि मन के संग सुनिन "मन की बात" कारीकरम।
- 2— केंद्रीय सूचना अउ प्रसारण राज्य मंत्री डॉक्टर एल. मुरुगन आज अपन एक दिवसीय छत्तीसगढ़ प्रवास के दौरान मुख्यमंत्री ले ओखर निवास स्थान म करीन सौजन्य मुलाकात।
- 3— बीजापुर जिला म आज माओवादी मन डहार ले लगाय के आई.ई.डी. के चपेट म आय ले सीआरपीएफ के 5 जिन जवान मन होइन घायल।

मन की बात

प्रधानमंत्री नरेंद्र मोदी ह किहीन हे कि मेक इन इंडिया पहल के सेति भारत विनिर्माण सक्ति केंद्र बन गे हवय। ओमन किहीन हे कि ए अभियान ले गरीब अउ मध्य वर्ग या फेर सूक्ष्म, लघु अउ मध्यम उद्यम मन ल बहुत फायदा होय हे। आकाशवाणी ले आज मन की बात कारीकरम के एक सौ चौदहवां कड़ी म प्रधानमंत्री ह मेक इन इंडिया पहल के सफलता के उल्लेख करीन। प्रधानमंत्री ह लोगन मन ले आग्रह करीन हे कि ओमन अवइया तिहार मन म देस म बने उत्पाद ल खरीदय। रोजगार म बदलाव के उल्लेख करत प्रधानमंत्री ह किहीन कि नवा सेक्टर के उभरे के संगेसंग रोजगार के प्रकृति घलो बदलत हवय। श्री मोदी ह "क्रियेट इन इंडिया थीम" के पच्चीस टिन चुनौती मनके बारे म बतइन।

ए बछर दू अक्टूबर के दस बछर पूरा करत स्वच्छ भारत मिसन के सफलता के उल्लेख करत प्रधानमंत्री ह किहीन कि ए ह, ए मिसन के सफलता हवय कि "कचरे से कंचन" के मंत्र लोगन मन के बीच लोकप्रिय होवत हे। ओमन किहीन कि अब मनखे मन रिड्यूस, रियूज अउ रिसाइकिल के बात करना सुरु कर दे हवय। ओमन ए मिसन ल जन अभियान बनइया लोगन मनके घलो सराहना करीन।

पौधा रोपण महाअभियान "एक पेड़ मां के नाम" म भाग ले खातिर लोगन मन ल प्रोत्साहित करत प्रधानमंत्री ह किहीन कि जम्मो समाज ल बड़ सुधर परिणाम मिले हे जउन प्रेरणादायी हवय। प्रधानमंत्री ह जल संरक्षण के महत्व ल बतावत 'कैच द रेन' अभियान के गोठबात घलो करीन। मन की बात कारीकरम के एक सौ चौदहवां कड़ी म प्रधानमंत्री ह किहीन कि ए कड़ी उंखर बर बिसेस रूप ले भावुक कर देने वाला हरय। काबर कि एखरे संग ए कारीकरम के दस बछर पूरा होवत हे। प्रधानमंत्री ह आकाशवाणी, दूरदर्शन अउ प्रसार भारती ले जुड़े लोगन मनके सराहना करत किहीन कि ओखर मनके सुधर परयास ले ही ए कारीकरम महत्वपूर्ण पड़ाव तक पहुंच पाय हे।

मन की बात—मुख्यमंत्री

मुख्यमंत्री विष्णुदेव साय ह आज अपन निवास कार्यालय म जन प्रतिनिधि मन के संग प्रधानमंत्री नरेंद्र मोदी के "मन की बात" कारीकरम ल सुनिन। ए मउका म मुख्यमंत्री ह किहीन हे कि प्रधानमंत्री के 'मन की बात' कारीकरम देसवासी के नवाचारी परयास ल जाने के जरूरी जरिया हवय। मोदी जी 'मन की बात' कारीकरम के जरिया ले एला देस—दुनिया के आगू बताथे। ओमन किहीन कि प्रधानमंत्री ह "स्वच्छ भारत मिसन" के सफलता म खुसी जतात देसवासी मन ल बधई दीन हवय।

ओलंपिक संघ-अध्यक्ष

मुख्यमंत्री विष्णुदेव साय ल आज छत्तीसगढ़ ओलंपिक संघ के निर्विरोध अध्यक्ष चुन ले गे हवय। रईपुर म आयोजित छत्तीसगढ़ ओलंपिक संघ के बिसेस आम सभा के बइठका म रिटर्निंग ऑफिसर अशोक कुमार अग्रवाल ह उंखर निर्विरोध अध्यक्ष चुने जाय के घोसना करीन। उहें, मंत्री केदार कश्यप, सांसद बृजमोहन अग्रवाल अउ विजय बघेल समेत दस झिन लोगन मन ल छत्तीसगढ़ ओलंपिक संघ के निर्विरोध उपाध्यक्ष चुने गे हवय। रिटर्निंग ऑफिसर ह मुख्यमंत्री ल अध्यक्ष चुने जाय के प्रमाण पत्र सौंपिन।

सूचना प्रसारण राज्यमंत्री-दौरा

केंद्रीय सूचना अउ प्रसारण राज्य मंत्री डॉक्टर एल. मुरुगन ह आज अपन एक दिवसीय छत्तीसगढ़ प्रवास के दौरान राजधानी रईपुर म मुख्यमंत्री विष्णुदेव साय ले ओखर निवास स्थान म सौजन्य मुलाकात करीन। मुख्यमंत्री ह केंद्रीय राज्य मंत्री डॉक्टर मुरुगन ल सॉल अउ स्मृति चिन्ह भेंट कर उंखर आत्मीय सुवागत करीन।

स्वच्छता ही सेवा

“स्वच्छता ही सेवा” अभियान के तहत प्रदेश म ए बेरा स्वच्छता संबंधी कतकोन गतिविधि मनके आयोजन करे जावत हे। इही कड़ी म केंद्रीय अवासन अउ सहरी कार्य राज्य मंत्री तोखन साहू अउ उप मुख्यमंत्री अरुण साव ह आज रईपुर म “स्वच्छता ही सेवा” पखवाड़ा के चलत श्रमदान करीन। ओमन रईपुर के गायत्री नगर स्थित जगन्नाथ मंदिर परिसर म झाड़ू लगाके साफ-सफई करीन। करीकरम म सफई कर्मचारी मनके सम्मान घलो करे गीस। संगेसंग लोगन मन ल स्वच्छता म भाग लेवय खातिर सपथ घलो देवाय गीस। इही दौरान ओमन सफई कर्मचारी अउ स्वच्छता दीदी मन ल ई.एस.आई.सी. कार्ड अउ पी.पी.ई. किट प्रदान करीन।

ए मउका म केंद्रीय मंत्री तोखन साहू ह किहीन कि प्रधानमंत्री नरेंद्र मोदी डहार ले सुरु करे गे, ए अभियान ले लोगन मन म जागरूकता आय हवय। ओमन किहीन कि पूरातरीका ले स्वच्छता के लक्ष्य ल हासिल करे बर शासन-प्रशासन के संग सक्रिय जन-सहभागिता जरूरी हवय।

ओति, कोंडागांव जिला म अखिल भारतीय पूर्व सैनिक सेवा परिषद डहार ले आयोजित ‘स्वच्छता ही सेवा’ पखवाड़ा के तहत ट्रेनी लइका मन ह मानव श्रृंखला बनाके स्वच्छता के संदेस दीन। संगेसंग साइकिल अउ बाईक रैली घलो निकालिन, जेला नगर-पालिका उपाध्यक्ष जसकेतु उसेंडी ह हरा झंडी देखाके रवाना करीन। ए रैली म तकरीबन 500 लोगन मन ह हिस्सा लीन।

ऐति, गौरेला-पेण्ड्रा-मरवाही जिला के कलेक्टर लीना कमलेश मंडावी अउ जन प्रतिनिधि मन समेत आम नागरिक मन ह आज नगर-पालिका परिषद गौरेला के मंगली बाजार क्षेत्र म श्रमदान कर साफ-सफई करीन। संगेसंग स्वच्छता रैली के आयोजन घलो करे गीस। ए मउका म कलेक्टर ह स्वच्छता के प्रति लोगन मन ल सपथ घलो दिलाइन।

इही बीच, कांकेर जिला के रहइया जानेमाने कास्ट सिल्पकार अउ पद्मश्री अजय कुमार मंडावी ह लोगन मनले “स्वच्छता ही सेवा” अभियान ले जुड़ के तीर-तखार के सफई करे के अपील करीन हवय।

केंद्रीय मंत्री-युवोदय शुभारंभ

केंद्रीय जल सक्ति मंत्री सी.आर. पाटिल अउ मुख्यमंत्री विष्णुदेव साय ह काली राजनांदगांव जिला के बरगा गांव म “स्वच्छता ही सेवा” कारीकरम के दौरान “राजनांदगांव युवोदय” के शुभारंभ करीन। ए मउका म वीडियो अउ ओ.डी.एफ. प्लस पोस्टर के लॉन्चिंग घलो करे गीस। कारीकरम म युवोदय लइका मन डहार ले स्वच्छता उपर नुक्कड़ नाटक अउ कटआउट के प्रदर्शन करे गीस। उहें, स्वच्छता के क्षेत्र म सुधर कामबूता करे खातिर राजनांदगांव, डोंगरगढ़ अउ छुरिया विकासखंड ल सम्मानित करे गीस।

जवान-घायल

बीजापुर जिला म आज माओवादी मन डहार ले लगाय के आई.ई.डी. के चपेट म आय ले सीआरपीएफ के 5 झिन जवान मन घायल होगिन हे। बीजापुर के पुलिस अधीक्षक जितेन्द्र यादव ह बतइन कि ए घटना जिला के तरेम क्षेत्र म चिन्नागेलूर कैम्प के तीर म होय हे। ए जवान मन ह जब ए इलाका म सर्चिंग अभियान खातिर निकले रिहीन, इही दौरान जवान मन ल रद्दा म एक ठिन आई.ई.डी. मिलिस, जेला निष्क्रिय करे के दौरान एमा ब्लास्ट होगिस, एखर ले पांच झिन जवान मन घायल होगिन। घायल जवान मन ल इलाज खातिर बीजापुर जिला अस्पताल म भर्ती कराय गे हवय।

जवान—स्वागत

राजधानी रईपुर के साईंस कॉलेज मैदान म भारतीय सेना डहार ले 5 अउ 6 अक्टूबर के “नो योर आर्मी मेला” के आयोजन करे जाही। ए मेला म आम जनता ल भारतीय सेना ल करीब ले जाने के मउका मिलही।

इही बीच, ए मेला म भाग ले खातिर भारतीय सेना के जवान मन ह आज रईपुर पहुंचिन। रेलवे स्टेसन म कलेक्टर गौरव कुमार सिंह अउ जिला प्रशासन के अधिकारी मन ह ए जम्मो जवान मनके सुवागत करीन।
